

1317.

Na osnovu člana 7 stav 2 Zakona o uređenju tržišta poljoprivrednih proizvoda („Službeni list CG“, broj 51/17) i člana 39 stav 1 Zakona o poljoprivredi i ruralnom razvoju („Službeni list CG“, br. 56/09, 34/14, 1/15 i 30/17), Ministarstvo poljoprivrede i ruralnog razvoja donijelo je

PRAVILNIK O NAČINU OZNAČAVANJA, PRODAJNE OZNAKE I USLOVIMA ZA STAVLJANJE NA TRŽIŠTE MLIJEKA I MLIJEČNIH PROIZVODA*

Član 1

Ovim pravilnikom propisuje se način označavanja, prodajne oznake i uslovi za stavljanje na tržište mlijeka i mliječnih proizvoda.

Član 2

Mlijeko je prirodni sekret mliječne žlijezde životinja iz uzgoja, dobijen jednom ili više muža, bez dodatih ili oduzetih njegovih prirodnih sastojaka.

Naziv „mlijeko” može se koristiti za označavanje mlijeka kojem nakon tehnološke obrade nije promijenjen sastav ili za mlijeko čiji je sadržaj masti u skladu sa članom 6 ovog pravilnika.

Naziv „mlijeko” može se koristiti sa jednom ili više riječi kako bi se označila vrsta, klasa, porijeklo i/ili predviđena upotreba mlijeka, opisala mehanička obrada ili promjena sastava kojoj je mlijeko podvrgnuto, pod uslovom da se promjena sastava odnosi samo na dodavanje i/ili oduzimanje sastojaka prirodno prisutnih u mlijeku.

Član 3

Mliječni proizvodi su proizvodi dobijeni isključivo od mlijeka, uz dodavanje sastojaka potrebnih za njihovu proizvodnju, pod uslovom da ti sastojci nijesu dodati kako bi djelimično ili potpuno zamijenili bilo koju mliječnu komponentu.

Mliječni proizvodi označavaju se i stavljaju na tržište pod sljedećim nazivima:

- surutka;
- pavlaka;
- maslac;
- mlaćenica;
- tekući maslac;
- kazeini;
- bezvodna mliječna mast (AMF) (maslo);
- sir;
- jogurt;
- kisjelo mlijeko;
- maslo;
- kajmak ili skorup;
- kazeinati i koprecipati;
- smrznuti dezerti;
- kefir;
- kumis;
- viili/fil;
- smetana;
- fil;
- rjaženka;
- rugušpiens.

Mliječni proizvodi podvrgnuti jonizujućem zračenju označavaju se u skladu sa propisom kojim se uređuje način tretiranja hrane jonizujućim zračenjem.

Član 4

Mliječni proizvodi kojima su, osim sastojaka od mlijeka, dodati i drugi sastojci, označavaju se jednom ili više riječi radi označavanja drugih sastojaka koji nijesu sastojci proizvoda od mlijeka.

Drugi sastojci ne mogu zamijeniti bilo koju mliječnu komponentu i u zavisnosti od količine dodatih drugih sastojaka vrši se označavanje proizvoda.

Za mlijeko, osim kravljeg i mliječne proizvode koji nijesu proizvedeni od kravljeg mlijeka, obavezno se navodi i vrsta životinje od koje potiču.

Član 5

Mliječni proizvodi, koji u pogledu kvaliteta i karakteristika predstavljaju tradicionalne proizvode, označavaju se na način propisan ovim pravilnikom.

Proizvodi koji ne ispunjavaju uslove propisane ovim pravilnikom ne mogu se označavati i deklarirati na način koji direktno ili indirektno upućuje da se radi o proizvodu od mlijeka.

Ako se radi o proizvodu koji sadrži mlijeko ili mliječne proizvode, naziv „mlijeko” ili nazivi iz člana 3 ovoga pravilnika, mogu se koristiti samo da bi se opisale osnovne sirovine, odnosno sastojci u skladu sa propisom kojim je uređeno informisanje potrošača o hrani.

Član 6

Mlijeko namijenjeno konzumaciji stavlja se na tržište kao:

1) sirovo mlijeko, odnosno mlijeko koje nije zagrijavano na temperaturi većoj od 40 °C niti je bilo podvrgnuto nekom drugom postupku koji ima isti efekat;

2) punomasno mlijeko, odnosno termički obrađeno mlijeko koje u odnosu na sadržaj mliječne masti ispunjava jedan od sljedećih zahtjeva:

– standardizovano punomasno mlijeko sa najmanje 3,50% mliječne masti;

– standardizovano ekstra punomasno mlijeko sa najmanje 4,00% mliječne masti, a najviše 9,99% mliječne masti;

– nestandardizovano punomasno mlijeko sa najmanje 3,50% mliječne masti, kod koga procenat mliječne masti nije promijenjen od muže, kao ni dodavanjem ili uklanjanjem mliječne masti, a ni miješanjem sa mlijekom čiji je prirodni sadržaj mliječne masti bio promijenjen;

3) djelimično obrano mlijeko odnosno termički obrađeno mlijeko koje sadrži najmanje 1,50% a najviše 1,80% mliječne masti;

4) obrano mlijeko odnosno termički obrađeno mlijeko sa najviše 0,50% mliječne masti.

Izuzetno od stava 1 tačka 1 ovog člana, termički obrađeno mlijeko koje ne ispunjava uslove iz stava 1 tačka 2 ovog člana u pogledu procenta mliječne masti, može se staviti na tržište kao mlijeko, a procenat mliječne masti mora biti jasno čitljiv i označen sa jednim decimalnim mjestom „__% mliječne masti”.

Mlijeko iz stava 2 ovog člana ne može se označavati kao punomasno, djelimično obrano ili obrano.

Izuzetno od stava 1 tačka 2 alineja 3 ovog člana, termički obrađeno mlijeko, može se stavljati na tržište u slučaju promjena:

1) prirodnog sadržaja mliječne masti oduzimanjem ili dodavanjem pavlake ili dodavanjem punomasnog mlijeka, djelimično obranog mlijeka ili obranoga mlijeka kako bi odgovarao zahtjevima za sadržajem mliječne masti za mlijeko namijenjeno konzumaciji;

2) obogaćivanja mlijeka mliječnim bjelančevinama, mineralima ili vitaminima, pod uslovom da nakon obogaćivanja bjelančevinama sadržaj bjelančevina bude najmanje 3,8% ili veći;

3) smanjenja sadržaja laktoze konverzijom u glukozu i galaktozu.

Promjene iz stava 4 tač. 2 i 3 ovoga člana navode se na ambalaži proizvoda na način da su lako vidljive, čitljive i neizbrisive.

Podaci o hranljivim vrijednostima navode se u skladu sa zakonom kojim je uređena bezbjednost hrane.

Član 7

Mlijeko namijenjeno konzumaciji su proizvodi iz čl. 2 i 3 ovog pravilnika koji su namijenjeni za isporuku potrošaču bez dalje obrade.

Samo mlijeko koje ispunjava zahtjeve za konzumaciju smije se stavljati u promet bez prerade direktno krajnjem potrošaču, a koje je označeno u skladu sa ovim pravilnikom.

Član 8

Mlijeko namijenjeno konzumaciji može se stavljati na tržište ako ima:

1) tačku smrzavanja, približno jednaku prosječnoj tački smrzavanja sirovog mlijeka zabilježenu u području porijekla prikupljenog mlijeka;

2) gustinu veću od 1028 g/l za mlijeko sa 3,5% mliječne masti pri 20 °C ili odgovarajuću masu po litru mlijeka sa drugačijim udjelom mliječne masti;

3) najmanje 2,9% bjelančevina u mlijeku sa 3,5% mliječne masti ili odgovarajuću koncentraciju u slučaju mlijeka sa drugačijim udjelom mliječne masti.

Član 9

Danom početka primjene ovog pravilnika prestaje primjena člana 21 i čl. 23 do 37 Pravilnika o kvalitetu i drugim zahtevima za mleko, mlečne proizvode, kompozitne mlečne proizvode i starter kulture („Službeni list SRJ”, broj 26/02).

Član 10

Ovaj pravilnik stupa na snagu osmog dana od dana objavljivanja u „Službenom listu Crne Gore“, a primjenjivaće se od 1. januara 2022. godine.

* U ovaj Pravilnik prenijete su odredbe Regulative Evropskog parlamenta i Savjeta br. 1308/2013 od 17. decembra 2013. o uspostavljanju zajedničke organizacije tržišta poljoprivrednih proizvoda i stavljanju izvan snage uredbi Vijeća (EEZ) br. 922/72, (EEZ) br. 234/79, (EZ) br. 1037/2001 i (EZ) br. 1234/2007. Preuzete su odredbe vezane za član 78 i Prilog VII, Dio III i Dio IV.

Broj: 320-1681/18-3

Podgorica, 17. oktobra 2018. godine

Ministar,
mr **Milutin Simović**, s.r.